

Ło łosiołku kieryn chciał być w zocy /bajka w gwarze śląskiej /

Wele Betlejym we starej szopie
miyszkoł s bydełkiym łosiołek mały
i tak jak wszyjscy mioł tyż marzynie
żeby podziwioł go kejs świat cały

Niemrawy taki i niypozorny
chcioł żeby insi go w zocy mieli
- Trza mi sie uczyć furgać a wtedy
wszyjscy już bydom ło mje wiedzieli

A że boł łosłym toż niy poradzioł
furgać jak ptoki na nic starani
pszeca kopytka mo a niy krzydła
i tak do końca świata łostanie

-Terazki musza łostać śpiywokiym
wczas rano puda kaj pastuszkowie
pasajom łowce zaśpiywom s nimi
a śpiywać umia koždy to powiy

Choć ćwiczoł łosioł calutki ranek
i po wieczery aż kajś do ćmoka
bez to śpiywani boznujom s niego
że zamiast talyntu dostowo ptoka

Toż prziszłoł nazot do swoji szopy
zmochany rykiym usnoł na sianie
kiedy sie zbudzioł przeciyro gały
bo widzi bajtla i słyszy grani

-Śnik to naprowda czy mi sie zdowo
co to za gowiydź i wiela tego
jakiś geszynki jakiś klynkani
to wszystko skuli bajtla małego
Widza że w zocy wielki go majom
szkoda że dlo mje niy je szkryflano
nie byda gorszym jak sie pokłonia

co lepsze zegna przed nim kolano
Tyn bajtel bydzie kiedyś Paniskiyem
coż ...zowiść ludzko niy mo granicy
bezmała Herod co rzondzioł państwem
na śmierć małego dziyciontka liczy

A że nie wiedzioł kieryn to bajtel
łobejmie po nim tron we przyszłości
toż kozoł zabić malutki synki
żeby dać upust łoszklivej złości

A kiedy doszły do szopy wieści
ło rzeźli jaki tyn gizard zgotowoł
przbrany Łojciec bajtla z stajynki
droga ucieczki już prziszzykowoł

-Niy byda siedzioł po darymnicy
muszą Wom pomoc Jozefku miły
ładuj na moj grzbiet bajtla s mamulkom,
zaryczoł łosioł ze cołki siły
Uciekać musisz życi ważniejsze
a długo droga niy straszno pszecca
mom siły tela że przez te pioski
hań do Egiptu drapko pszeleca

I tak rajzowoł łosioł bez miasta
bez miedze i wsie we dnie i nocy
bo pojon biydok że to co robi
to pomoc kiero dlo inszych w zocy

Regina Sobik